

Uunga siunnersuut:**Unammilleqatigiinneq pillugu Inatsisartut Inatsisaata allanngortinnissaa pillugu
Inatsisartut Inatsisaat**

(Niuertarfinnik paasiniaaneq, immikkoortortamik misissuinerit, Unammilleqatigiinnermut Ataatsimiititaliap toqqaanera, taasinermut maleruagassat ingerlasinnaassuserlu, suliffeqarfiup allagaatinik takunnissinnaanera, killigititamik unitsitsineq il.il.)

§ 1

Unammilleqatigiinneq pillugu Inatsisartut Inatsisaat nr. 1, 15. maaji 2014-imeersoq, tak. Unammilleqatigiinneq pillugu Inatsisartut inatsisaat pillugu Namminersorlutik Oqartussat nalunaarutaat nr. 2, 26. marsi 2021-meersoq, Inatsisartut Inatsisaat nr. 55, 25. novembari 2024-meersumi allanngortinneqartumi, ataani allanneqartut allanngortinneqassapput:

1. § 20-mi imm. 6-7-tut ilanngunneqassapput:

” *Imm. 6.* Imm. 1-4-ni killigititat immikkuullarissumik unitsinneqassapput, tassani Unammilleqatigiinnermut Ataatsimiititaliaq kattunneq akuerineqassanersoq pillugu nalilersuinissaminut paasissutissanik noqqaassuteqarsimappat, aamma

- 1) Piumasaqaat, suliffeqarfiit peqataasut ilaannit naleqquttumik pissuteqarluni ilanngunneqarsinnaanera, peqqutaavog, aamma
- 2) Unammilleqatigiinnermut Ataatsimiititaliaq aaliangersimasumik akissuteqarnissanut killigititaqarpoq, suliffeqarfiullu peqataasup ilaannit unioqqutinneqarsimalluni.

Imm. 7. Killigititamik unitsitsineq, tak. imm. 6, paasissutissat noqqaassutigineqartut ataatsimiititaliamut tunniunneqarnissai tikillugu, killigititaq atatinneqaannassaaq.”

2. Kapitali 6-imut qulequtaq ima oqaasertaliorneqarpoq:

“Kapitali 6

Tamanut ammatitsineq, allagaatinik takunnissinnaaneq aamma inummut paasissutissanik suliarinnineq”

3. § 24 ima oqaasertaliorneqarpoq:

” **§ 24.** Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat Inatsisartut inatsisaat manna malillugu sulianut atuutinngilaq, tassani ilaanatik § 4, imm. 2, § 7, imm. 6, § 8, imm. 2, 2. pkt., § 9, 2. pkt. § 10, imm. 1, § 11, imm. 6, § 12, imm. 3,

2. pkt., § 12, imm. 5, 2. pkt., § 15, imm. 4, § 17, imm. 3, § 26, imm. 3, aamma § 34, imm 3 malillugit aalajangersakkanik aalajangersaanissaq pillugu suliat.

Imm. 2. Suliani una Inatsisartut Inatsisaat malillugu aalajangiiffigineqareersimasuni aalajangiiffigineqartussaniluunniit, suliffeqarfiit, uppersaatini atugaat pillugit paasissutissanik imaqarpata, imm. 1-imi takunnissinnaatitaanermut pisinnaatitaagaluaaraanniluunniit, paasissutissat sunilluunniit imaqaraluarpata, Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni § 4, imm. 2 naapertorlugu takunnissinnaatitaasut.

Imm. 3. Paasissutissat imminnermut tunngasut pillugit takunnissinnaatitaanermut pisinnaatitaaneq, tak. imm. 2, suliffeqarfik pillugu paasissutissat uppersaatini, suliffeqarfiup allap teknikikkut paasissutissaatai, periusai aamma ingerlatsinermi suliffimmilu atukkat aamma paasissutissat allat allanit takuneqartussaannigitsut pillugit, allaqqasunut atuutinneqanngilaq.

Imm. 4. Suliani, una Inatsisartut Inatsisaat malillugu aalajangiiffigineqartussani, Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni § 6, imm. 1 assinganik atorneqassaaq.

Imm. 5. Pisortaqaqfimmu allamut Inatsisartut Inatsisaat malillugu paasissutissat ingerlateqqinneqarsinappata, imm. 1-4 aappiullugu atuutissaaq.”

4. § 24-p kingorna ilanngunneqassaaq:

” § 24 a. Aalajangiissutit uku il.il. oqartussaasunit akisussaasuusuniit tamanut ammasumik saqqummiunneqassapput:

- 1) Unammilleqatigiinnermut Ataatsimiititaliap tunngavilersuutitut oqaaseqaataa.
- 2) Naalakkersuisut § 2, imm. 4 malillugu akissuteqaatai.
- 3) Atuisartoqarnermut Unammilleqatigiinnermullu Aqutsisoqarfiup Unammilleqatigiinnermut Ataatsimiititaliaq sinnerlugu aalajangiissutai, tassani aalajangiussaq Inatsisartut Inatsisaannik atuinermut paasinnissinnaassutsimut pingaaruteqarpat imaluunniit tamanit soqutigineqarpat.
- 4) Suliani § 38-mut innersuussuteqartoqartillugu parnaarussassannortitsisoqassaaq imaluunniit akiligassiussuteqartoqassaaq. Tamanut saqqummiussineq eqqartuussummit, akiligassitsinnermit imaluunniit tassanga eqikkaanermiit pissaaq.

Imm. 2. Unammilleqatigiinnermut Ataatsimiititaliaq Unammilleqatigiinnermut Ataatsimiititaliap suleriesia paasissutissiissutaalu pillugit tamanut saqqummiussinnaavoq.

Imm. 3. Imm. 1 aamma 2 malillugit tamanut saqqummiinnermi teknikikkut atukkat pillugit paasissutissat, ilisimatuuutut misissuinnermut, nioqquosioriaatsimut, nioqquutinut kiisalu ingerlatsinermut aamma suliffeqarfiup isertugaatai pineqartumi ilaatinneqarlutik, tamanut saqqummiunneqassanngillat, tassani paasissutissat pineqartumut imaluunniit suliffeqarfiup aningaasaqarneranut pingaaruteqarpata. Aammattaaq suliffeqarfimmi sullinneqartut aaliangersimasut pillugit paasissutissat, Aningaasaqarnermut Nakkutilliisunit

nakkutigineqartut, tamanut saqqummiunneqassanngillat.

Imm. 4. Unammilleqatigiinnermut Ataatsimiititaliamut paasissutissanik tunniussisussa, ataatsimiititaliap siulittaasua, imm. 3 tunngavigalugu paasissutissat tamanut saqqummiunneqannginnissaannut, aamma ataatsimiititaliami ilaasortanut tunniunneqannginnissaannut piomasqaateqarsinnaavoq. Siulittaasoq paasissutissat qanoq annertutigisumik tamanut saqqummiunneqassanersut pillugit inerniliissummik aalajangiissaaq.”

5. § 24 a-p kingorna ilanngunneqassaaq:

” **§ 24 b.** Inatsisartut Inatsisaat malillugu suliani misissuinernilu paasissutissiinissamut pisussaaffik inunnut paasissutissanik suliarinnittarneq pillugu inatsimmi kapitali 8 aamma 9 atuutsinneqassanngilaq.”

6. § 27, imm. 2, ima oqaasertalerneqarpoq:

” *Imm. 2.* Ataatsimiititaliami siulittaasoq ilaasortallu Naalakkersuisunit ukiut sisamakkaarlugit toqqarneqartassapput. Piffissaliussap qaangiunnerani nutaamik ataatsimiititaliortoqarsimanngippat, ilaasortaareersut atorfirminni ingerlaannassapput, tassani nutaamik ataatsimiititaliortoqarnissaa tikillugu.”

7. § 27, imm. 5, ima oqaasertalerneqarpoq:

” *Imm. 5.* Naalakkersuisut ilaasortaq ataaseq atuisartoqarnermut kattuffinnit ataatsimoortuni inassuteqarneq malillugu aamma ilaasortaq ataaseq immikkut pisortat inuussutissarsiornermik ingerlatsinerannik ilisimasaqartoq kommuninit ataatsimoortuni inassuteqarneq malillugu Naalakkersuisut toqqassavaat.”

8. § 27-mi imm. 5-ip kingorna nutaatut ilanngunneqassaaq:

” *Imm. 6.* Naalakkersuisut atuisartoqarnermut pissutsinut ilisimasalimmik Unammilleqatigiinnermut Ataatsimiititaliamut ilaasortassamik toqqaassapput. Ataatsimiititaliap allattoqarfia toqqaanissamut qaammatit pingasut qaangiutsinnagit tamanut ammasumik tusagassiuutitigut aamma Atuisartoqarnermut Unammilleqatigiinnermullu Aqutsisoqarfiup nittartagaatigut saqqummiussisaaq, tassani soqutiginnittut atorfirmut qinnuteqarsinnaaniassammata.”

Matuma kingorna imm. 6 imm. 7-inngusaaq.

9. § 27-p kingorna ilanngunneqassaaq:

” **§ 27 a.** Unammilleqatigiinnermut Ataatsimiititaliaq allakkatigut taasinikkut imaluunniit ataatsimiinnermi aalajangiussisaaq.

Imm. 2. Ataatsimiititaliaq, siulittaasoq, imaluunniit peqataasinnaangippat siulittaasup tulliaata, minnerpaamillu ilaasortat allat pingasut, peqataaneranni aalajangiisinnaavoq.

Imm. 3. Ataatsimiititaliap aalajangiussai nalinginnaasumik taasinermi amerlanerussuteqarnikkut aalajangiiffigineqassapput. Taasinermi amerlaqatigiittoqassappat, siulittaasup, imaluunniit peqataannginnerani siulittaasup tulliaata, taasinera inernilunneqassaaq.”

10. § 30 ima oqaasertaliorneqassaaq:

“ **§ 30.** Unammilleqatigiinnermut Ataatsimiititaliaq aamma Atuisartoqarnermut Unammilleqatigiinnermullu Aqutsisoqarfik, Inatsisartut inatsisaat malillugu pisinnaatitsissuteqarnikkut suliaminnik suliaqarnissaminnut paasissutissanik, inuit imaluunniit inatsisitigut inuttut pisinnaatitaasut noqqaassummik tigusaqartut iserfigisinnaasaanik, noqqaassuteqarsinnaapput, kiisalu inatsisartut inatsisaanni aalajangersakkani atukkanut tunngasut ilaatinneqartut pillugit nalilersuinissaminnut atugassaminnik noqqaassuteqarsinnaallutik.

Imm. 2. Unammilleqatigiinnermut Ataatsimiititaliap aamma Atuisartoqarnermut Unammilleqatigiinnermullu Aqutsisoqarfiup aningaasaqarnermut saqqummiussat, paasissutissat, atuakkat assilineri, suliffeqarfiup paasissutissaatai allat elektronikkikkullu paasissutissanik toqqorsiviit noqqaassutigisinnaavai.

Imm. 3. Imm. 1 malillugu suliffeqarfik, suliffeqarfiit kattunnikut, inuit imaluunniit inatsisitigut inuttut pisinnaatitaasut paasissutissiinissaminut pisussaaffeqarput.

Imm. 4. Ataatsimiititaliaq aqutsisoqarfilluunniit paasissutissanik noqqaassutigineqartunik tigusinissaanut piffissamik killigititamik naleqquttumik Atuisartoqarnermut Unammilleqatigiinnermullu Aqutsisoqarfik inissiissaaq.

Imm. 5. Imm. 1-imi paasissutissat taaneqartut Atuisartoqarnermut Unammilleqatigiinnermullu Aqutsisoqarfiup Sverigemi, Norgemi, Islandimi, Finlandimi, Savalimmiuni Danmarkimilu, tak. § 34, unammilleqatigiinnermik oqartussanut ikiuinermini atornissai aamma piumasarneqarsinnaapput, oqartussat taakku namminneq nunaminni unammilleqatigiinneq pillugu malittarisassanik atuinissaat siunertaralugu.”

11. § 30-p kingorna ilanngunneqassaaq:

” **§ 30 a.** Atuisartoqarnermut Unammilleqatigiinnermullu Aqutsisoqarfik Unammilleqatigiinnermut Ataatsimiititaliap aaliangersimasumi arlalinniluunniit nioqquteqartuni nioqqutinik misissuisoqarnissaanut imaluunniit inuussutissarsiornermi aaliangersimasumut arlalinnuluunniit ilusilersuinissamut aaliangernerata kingorna aallartitsisinnaavoq, tassani Unammilleqatigiinnermut Ataatsimiititaliaq isumaqarpat, inuussutissarsiornerup unammilleqatigiinneranut innarliisumik sunniuteqarpat.

Imm. 2. Unammilleqatigiinnermut Ataatsimiititaliap imm. 1 malillugu aaliangiinerata kingorna, Atuisartoqarnermut Unammilleqatigiinnermullu Aqutsisoqarfik ataatsimiititaliap niuerfimmik misissuinissaq pillugu aallarniutissamik allagaqaataa tamanut tusarniaassutigineqaqqaassaaq.

Imm. 3. Unammilleqatigiinnermut Ataatsimiititaliap imm. 1 naapertorlugu Atuisartoqarnermut Unammilleqatigiinnermullu Aqutsisoqarfik niuerfimmik misissuisoqassasoq, Atuisartoqarnermut Unammilleqatigiinnermullu Aqutsisoqarfiup matumani misissorneqartussat nalunaarutigalugit tamanut saqqummiissaaq.

§ 30 b. Atuisartoqarnermut Unammilleqatigiinnermullu Aqutsisoqarfik, niuerfimmik misissuinermini arlaannik aaliangersimasumik pissusilimmik imaluunniit inuussutissarsiornermi arlalinnik unammilleqatigiinnermut sunniuteqartoq nalilerpagu, aqutsisoqarfiup iliuserisassatut peqqussuteqarsinnaavoq.

Imm. 2. Peqqussutit inuussutissarsiuteqartuni unammilleqatigiinnermut sapinngisamik ajoqusiinnginnissai anguniarlugu unammilleqatigiinnerlu ingerlalluartinniarlugu suliffeqarfimmut, suliffeqarfinnut kattunnikunut imaluunniit inatsisilerituumut kimulluunniit tunniunneqarsinnaapput.

Imm. 3. Peqqussut piffissami aaliangersimasumi piffissaligaanngitsumilluunniit atuutsinneqarsinnaavoq.

Imm. 4. Aqutsisoqarfiup niuerfimmi attuumassuteqartut pisorta qarfiillu peqqussuteqannginnermi tusarniaaffigeqqaassavai.

Imm. 5. Imm. 1 malillugu peqqussut unammilleqatigiinnermut isumannaarisumik naammaginarthuussaaq, pisariaqarlunilu naleqquttuulluni.

§ 30 c. Atuisartoqarnermut Unammilleqatigiinnermullu Aqutsisoqarfik suliffeqarfimmit, suliffeqarfinnut kattunnikunit imaluunniit inatsisilerituumit neriorsuuteqalersitsisumik aalajangiisnaavoq:

- 1) Atuisartoqarnermut Unammilleqatigiinnermullu Aqutsisoqarfiup nalilerpagu, inuussutissarsiuteqartuni iliutsitsigut periutsitigulluunniit inuussutissarsiutigisaanni pineqartumi unammilleqatigiinnermut innarliisoqarpat, aamma
- 2) Aqutsisoqarfiup nalilerpagu, neriorsuutit inuussutissarsiutigisaanni pineqartumi innarliissutinut ikuutaasinnaappata unammilleqatigiinnermullu siuarsaataallutik.

Imm. 2. Aqutsisoqarfiup niuerfimmi peqataasut pisorta qarfiillu peqqussuteqartigani tusarniaaffigeqqaassavai.

Imm. 3. Imm. 1 malillugu aalajangiinerit piffissami aaliangersimasumi atuutsinneqartassapput, imaluunniit piffissamik killiliussaqaanngitsumik, pisussaaffigisamik neriorsuut nalunaarutigineqarnerata kingorna, Atuisartoqarnermut Unammilleqatigiinnermut Aqutsisoqarfik § 30 b, imm. 1 malillugu peqqussuteqarnissamut, tunngavissaqarunnaartoq

inissittassavaa. § 29, imm. 2-3, assingusumik atorneqartassaaq.

§ 30 d. Atuisartoqarnermut Unammilleqatigiinnermullu Aqutsisoqarfik § 30 b, imm. 1 malillugu peqqussuteqarpat imaluunniit § 30 c, imm. 1 malillugu neriorsuummik pituttuisumik aalajangiippat, aqutsisoqarfik suliffeqarfinnut, suliffeqarfinnut kattunnikunut imaluunniit inatsisilerituunut suliameqataasunut ilisimatitsissuummik nassiussissaaq.

Imm. 2. Atuisartoqarnermut Unammilleqatigiinnermullu Aqutsisoqarfik § 30 b, imm. 1 malillugu peqqussut pillugu aalajangiussaq aamma § 30 c, imm. 1 malillugu neriorsuummik pituttuisumik aalajangiussaq tamanut saqqummiussinnaavaa. 1. pkt. malillugu aalajangiissutimut missingersuummik tamanut saqqummiussinermi § 24 a, imm. 3 assingusumik atorneqartassaaq.

Imm. 3. Atuisartoqarnermut Unammilleqatigiinnermullu Aqutsisoqarfik § 30b, imm. 1 malillugu peqqussuteqartigani imaluunniit § 30 c, imm. 1 malillugu neriorsuummik pituttuisumik aalajangiussaqartigani, Atuisartoqarnermut Unammilleqatigiinnermullu Aqutsisoqarfiup illua-tungeriinnut aalajangiussaq nassiateqqaassavaa.

Imm. 4. Illua-tungeriinnit oqaaseqaateqarnissamut tunniussinissamut killigititaq sapaatit akunneranik arfinilinnik sivisussuseqarpoq.

Imm. 5. Suliani, sulianik suliarinnittarneq pillugu inatsit malillugu tusarniaasoqassappat, oqaaseqaateqarnissamut killigititaq sapaatit akunnerinik pingasunik sivisussuseqarpoq, tassani suliaq Unammilleqatigiinnermut Ataatsimiititaliamut saqqummiunneqareersimangippat. Kingullermi pineqartumi Unammilleqatigiinnermut Ataatsimiititaliaq sapaatit akunnerinik pingasunit sivikinnerusumik killigititassamik inissiisinnaavoq.

§ 30 e. Atuisartoqarnermut Unammilleqatigiinnermullu Aqutsisoqarfik Unammilleqatigiinnermut Ataatsimiititaliap niuerfimmik misissuinissamik aaliangiineraniit kingusinnerpaamik ukiut marluk qaangiutsinnagit tamanut saqqummiussinnaavoq, tak. § 30 a, imm. 3, ataani allaqqasut pillugit aalajangiinerit:

- a) § 30 b, imm. 1 malillugu peqqussuteqarneq,
- b) § 30 c, imm. 1 malillugu neriorsuummik pituttuineq, imaluunniit
- c) Niuerfimmik misissuineq naammassineqartoq pillugu tamanut saqqummiussineq.

Imm. 2. Atuisartoqarnermut Unammilleqatigiinnermullu Aqutsisoqarfik qaammatit arfinillit tikillugit killigititamik kinguartitsilluni aaliangiisnaavoq, matumanilu aaliangiineq tamanut saqqummiullugu.

Imm. 3. Inatsisartut Inatsisaanni §§ 31 aamma 32 Atuisartoqarnermut Unammilleqatigiinnermullu Aqutsisoqarfiup § 30 a, imm. 1 malillugu niuerfimmik misissuinerani assingusumik atorneqartassaaq.

§ 30 f. Atuisartoqarnermut Unammilleqatigiinnermullu Aqutsisoqarfik immikkoortumik

aaliangersimasumik misissuisinnaan-ngussaaq imaluunniit immikkoortortani aaliangersimasuni unammilleqatigiinnermut pissutsinut paasisaqarnerorusulluni immikkoortortani assigiinngitsuni (immikkoortortamik misissuinissamut) isumaqatigiissuteqarnikkut misissuisinnaanngussaaq.

Imm. 2. Atuisartoqarnermut Unammilleqatigiinnermullu Aqutsisoqarfiup imm. 1 malillugu misissuinissaminut nakkuginnilluni misissuinerit atorneqartillugit §§ 31 aamma 32-mi aalajangersakkat assingusumik atuupput.

Imm. 3. Atuisartoqarnermut Unammilleqatigiinnermullu Aqutsisoqarfik, § 24 a, imm. 3-mi aalajangersarneqartut malitsigisai, killigalugit imm. 1 malillugu misissuinerup inerneru pillugit tamanut saqqummiussisinnaavoq.”

12. § 34, imm. 1 aamma 2 ima oqaasertalerneqarpoq:

” Atuisartoqarnermut Unammilleqatigiinnermullu Aqutsisoqarfik unammilleqatigiinnermi pisortaqrarfiusunut allanut, Atuisartoqarnermut Unammilleqatigiinnermullu Aqutsisoqarfiup nipangiussimatitaanermut pisussaaffia malillugu, aamma pisortaqrarfiit unammilleqatigiinnermut inatsiseqarnerat pisariaqartumik ersarissarniarlugu, Naalagaaffeqatigiinnermilu Kalaallit Nunaata illugiimmik aamma amerlasuunik peqataaffiqineqartunik pisussaaffinnik pisussaaffeqarnerup naammassineqarnissaa qulakkeerniarlugu, paasisutissanik tunineqarsinnaatitaallunilu tunniussisinnaatitaavoq.

Imm. 2. Unammilleqatigiinnermi pisortaqrarfiusunut allanut paasisutissanik ingerlatitseqqiinnermi, Atuisartoqarnermut Unammilleqatigiinnermullu Aqutsisoqarfiup paasisutissat ataani allaqqasunik naammassinninersut qulakkeeqqaassavaa:

- 1) tiguisusaaq assingusumik nipangiussimatitaanermik pisussaaffeqartoq,
- 2) illugiimmik amerlasuunilluunniit peqataaffiqineqartumik isumaqatigiissutip atuutsinneqartup inissinneqareernerani atorneqarnissaa kisiat siunertarlugu, matumani paarlaateqatigiinneq naapertorlugu ingerlanneqassappat, aamma
- 3) Atuisartoqarnermut Unammilleqatigiinnermullu Aqutsisoqarfimmit ersarissumik pisinnaatitsissuteqarnermi kisimi ingerlatitseqqinneqarsinnaasut, pisinnaatitsissutillu siunertaanut kisiat ingerlateqqinneqassasut.”

13. § 34-p kingorna ilanngunneqassaaq:

” § 34 a. Atuisartoqarnermut Unammilleqatigiinnermullu Aqutsisoqarfik sulianik suliarinninnermini atukkaminik uppernarsaatiniq tamanut saqqummiissinnaavoq, tassungalu pingajuusumit oqaaseqaatit pisariaqartinneqarpata. § 24 a, imm. 3, tamanut saqqummiussinnermi assingusumik atorneqartarpoq.”

14. § 37 ima oqaasertaliorneqarpoq:

“ § 37. Naalakkersuisut imaluunniit Naalakkersuisunit matumangga akuerineqarluni pisussaatinneqartoq, ataani allaqqasuni ullormut imaluunniit sapaatip akunnikkaarlugit akileeqqussutinik peqqussuteqarsinnaavoq:

- 1) Inatsisartut Inatsisaat malillugu Unammilleqatigiinnermut Ataatsimiititaliap imaluunniit Atuisartoqarnermut Unammilleqatigiinnermullu Aqutsisoqarfiup noqqaassutigisinnaasaat,
- 2) Inatsisartut Inatsisaanni nalunaarutigineqarnikut malillugit piumasqaammik imaluunniit peqqussummik naammassinninneq, imaluunniit
- 3) neriorsuummik pituttuisunngortinneqarsimasumik naammassinninneq, tak. § 29 imaluunniit § 30 c, imm. 1.

Imm. 2. Imm. 1 malillugu akileeqqussutit, Nunatta Karsianut ikineqartassapput.”

15. § 38, imm. 1, nr. 11-mi, ”§ 29, imm. 1”-ip kingorna: ”imaluunniit § 30 c, imm. 1,” ilanngunneqassaaq,”

16. § 38, imm. 1, nr. 12-imi, ”§ 29, imm. 2,”-p kingorna: ”imaluunniit § 30 b, imm. 1,” ilanngunneqassaaq,”

17. § 38, imm. 1, nr. 14, ima oqaasertaliorneqassaaq:

“ 14) Unammilleqatigiinnermut ataatsimiititaliamut imaluunniit Atuisartoqarnermut Unammilleqatigiinnermullu Aqutsisoqarfimmu imaluunniit immikkoortoqarfimmik misissuinermi paasissutissanik eqqunngitsunik imaluunniit tammartitsisunik tunniussaartoq imaluunniit suliamut paasissutissarsiorfigisamut paasissutissat pingaartut nipangiunneqarpata.”

§ 2.

Inatsisartut Inatsisaat ulloq 1. juuli 2026-mi atuutilissaaq.

Imm. 2. Inatsisartut Inatsisaat suliffeqarfinnut kattunnikunut, tassa kattunnissamut isumaqatigiissuteqareersimasunut, piginnittussamit neqerooruteqartoqareerneratigut imaluunniit piginneqataasoqaruni Inatsisartut inatsisaata atuutsinneqalinnginnerani aqutseqataanissamut piginneqataasumik, atuutsinneqassanngilaq. Kattunnerni taamaattuni inaatsisit maannamut atuuttut atuussapput.

Namminersorlutik Oqartussat, ulloq xx. xxx 2026

Naalakkersuisut Siulittaasuat